

REFERAT TAA - Teknikkeqarnermut Avatangiisinullu Ataatsimiititaq d. 05-08-2026

Mødedato Onsdag d. 05. august 2026 kl. 19:00

Mødested Kommunalbestyrelsip ataatsimiittarfiani

Indholdsfortegnelse

Saqqaa.....	3
Oqaluuserisassat akuersissutigineqarneri.....	4
Nalunaarutit.....	5
Kalaallit Røde Korsianit aamma Donnas Dyreklinikimit eqqakkanik aallertarneq.....	6
Nuummi sumiiffiit aqquuserngillu taaguuserneqartussat.....	8
Nunatarsuup nunataani qamutininik motoorilinnik angallannissamut immikkut ittumik akuersissumm	10
4B1-B-mi inissiivimmut nunaminertamik atuineq – Naternaq, Qinnngorput.....	12
Illu aalaffiusoq Nuussuaq, Nuuk.....	14
Sanaartorfissat 9-p aamma 10-p, Eqinga Nuuk, atugassiissutigineqarneri.....	16
Illoqarfiup ilaanut pilersaarutitut siunnersuut 1C3-B - Dronning Ingridvej pillugu tamanut tusarnia	18
Illoqarfiup ilaanut pilersaarutitut siunnersuut 4B5-B Isuliffik pillugu tamanut tusarniaaneq.....	20
Nuummi biilininik inissiisarfinni kommunimiit nakkutilliisoqalernissaa.....	22
Tamalaat.....	24
Imaqarniliap akuerineqarnera.....	25

Ilaasortat

Uju Petersen (IA), Siulittaasoq

Arnanguak Steenholdt (IA)

Nitta Lyberth-Mørch (IA)

Peter Davidsen (S)

Mala Høy Kúko (S)

Kalaallit Røde Korsianit aamma Donnas Dyreklinikimit eqqakkanik aallertarneq

Pisortatigoortuunngitsumik suleriaatsimik misissuineq aamma killiliussaqaarnissamik pisariaqartitsinermik naliliineq

Aalajangiiffigisassaq

SagsID.: EMN-2026-01407

Sanarfinermut Avatangiisinullu Ingerlatsivik – pisortaq Søren Pedersen / SOSO

Inassuteqaat

Sanarfinermut Avatangiisinullu Ingerlatsivimmit Teknikkeqarnermut Avatangiisinullu

Ataatsimiititamat inassuteqaatigineqarpoq:

1. pisortatigoortuunngitsumik Kalaallit Røde Korsianit aamma Donnas Dyreklinikimit akeqanngitsumik eqqakkanik aallertarneq atorunnaarsinneqarnissaa ataatsimiititamat akuersissutigineqassasoq
2. ingerlataqartut tamarmik nalinginnaasumik atugassarititaasut malillugit Eqqagassaleriffimmut innersuunneqartassanersut imaluunniit siunissami ingerlataqartunut aalajangersimasunut pisortatigoortumik aaqqiissummik suliaqartoqassanersaq ataatsimiititamat eqqartorneqassasoq
3. ataatsimiititap aalajangernera pillugu illuatungiliuttunut attuumassuteqartunut ingerlatsivik ilisimatitsissuteqarnissanut piginnaatinneqassasoq

Suliamik saqqummiussineq

Eqqagassaleriffimmi ingerlatsinermik suliallit ukiorpaalunngortuni Kalaallit Røde Korsiat aamma Donnas Dyrekliniki oqarasuaatikkut saaffiginnittoqarnerani akeqanngitsumik eqqakkanik aallertarput. Avatangiisinut Eqqagassalerinermullu immikkoortortamit (Eqqagassaleriffik) aaqqiissuussaq politikikkut aalajangiussaansaq imaluunniit suleqatigiinnissamut isumaqatigiissutitigut pisortatigut aaqqiissutaanersaq uppersaatinik nassaartoqarsimanngilaq.

Ingerlataqartut taakku marluk suussusaat:

- Kalaallit Røde Korsiat inunnik ikiuniarneq pillugu peqatigiiffiuvoq/NGO.
- Donnas Dyreklinik imminut pigisutut suliffeqarfittut nalunaarsugaavoq, inuussutissarsiutigalugu uumasunut nakorsiartarfittut ingerlatsivik. Taamaalilluni uumasunut nakorsiartarfik Nuummi inuussutissarsiuteqartunut allanut, eqqakkanik namminneq isumaginnittartussat eqqagassalerinermullu akigititanik akiliuteqartartunut, sanillersuunneqarsinnaavoq.

Periuseq ajornartorsiutaasinnaasutit nalilerneqarpoq, pissutigalugu:

- kiffartuussinerup qaffasissusaanut annertussusaanulluunniit piumasaqaatinik aalajangersaasoqarnikuunngimmat
- aallertarneq ilaatigut immikkut ittumik suliaqarnissamut piumasaqaatitaqartarmat (ass. aputikkut maavaarnartukkat majuartarfitsigullu)
- aaqqiissut ingerlataqartunut marluinnarnut atuuppoq taamalu kinaassusersiorluni immikkoortitsinertut taaneqarsinnaalluni
- Nuummi peqatigiiffiit, kattuffiit suliffeqarfiillu sinneri namminneq Eqqagassaleriffimmut eqqakkanik tunniussisartussaallutillu akigititanut akiliuteqartarput
- aaqqiissut ingerlataqartunut amerlanerusunut annertusissappat amerlanerusunik sulisoqartariaqarlunilu aningaasaliisoqartariaqassaaq

Tamanna pillugu ingerlatsivimmit periuseq unitsinneqartariaqartutut nalilernerqarpoq, ataatsimiititamiit erseqqissunik piumasaqaatitalinnik ilaatigullu akigititanik aalajangersaanikkut nutaamik pisortatigoortumik aaqqiissuteqartoqarnissaa kissaatigineqarpat.

Ingerlatsivimmit aningaasatigut sulisoqarnikkullu naliliinerit

Maannakkut periuseq nalunaarsorneqanngitsumik piffissamik atuiffiusarpoq. Ingerlataqartut allat ilanngullugit annertusineqassappat sulisut angallassinikkullu isumalluutit amerlanerusut pisariaqartinneqassapput. Atorunnaarsitsineq aningaasartuuteqarnerunermik kinguneqassanngilaq.

Missingersuusiornermut Naatsorsuusiornermullu Immikkoortortamit aningaasatigut naliliineq

Pisariaqanngilaq.

Inatsisitigut tunngavissaq allakkallu tunngaviusumik uppersaataillit

- Kommunalbestyrelsen 2026-mut eqqakkat pillugit akit allattorsimaffiat
- Eqqagassalerineq pillugu malittarisassat
- Eqqakkat pillugit nalunaarut

Ilanngussaq

1. Nuummi peqatigiiffiit, kattuffiit suliffeqarfiillu takussutissiartaat

Nuummi sumiiffiit aqquuserngillu taaguuserneqartussat

Aalajangiiffigisassaq

SagsID.: EMN-2024-01887

Sanarfinermut Avatangiisinullu Ingerlatsivik – pisortaq Søren Pedersen / SSKP

Inassuteqaat

Sanarfinermut Avatangiisinullu Ingerlatsiviup Teknikkeqarnermut Avatangiisinullu Ataatsimiitsitamut inassuteqaatigaa:

1. ima, Aqquuserngup Eqlugalinnguit ilaata nutaamik taaguuserneqassasoq
2. Ima, Iliveqarfiit sumiinnertik aallaavigalugu taaguuserneqarnissaat
3. Ima, Aqquuserngit Narsaviaq / Salliarnaq aaqqissuunneri iluarsineqassasut
4. Ima, Sanaartorfissap nutaap aqqusinissaa taaguuserneqassasoq

Suliassamik saqqummiussaq

Eqlugalinnguit aqquuserngata ilaa taaguuserneqassasoq

Innuttaasumit saaffiginnissut tiguneqarpoq, siunnersuutigineqarluni aqqusineq Eqlugalinnguit ilaa suliarinnissimasoq tunngavigalugu taaguuserneqassasoq. Ilanngussami aappalaartumik qalipaaserneqartoq siunnersuutigineqarpoq taaguuserneqassasoq.

Inassut:

Peter Christensenip aqquusernga

Nassuiaat / tunngavilersuut:

Siunnersuutigineqartunut tunngavigineqarpoq illoqarfimmut pingaarutilimmik suliaqarsimanera pillugu takussutissinneqartariaqartoq. Innuttasumik saaffiginnissut kiisalu Tapersiilluni allakkat ilanngussani 5-mi 7-milu allaaserineqarput.

Iliveqarfiit sumiiffii malillugit taaguuserneqassasut

Inassutit:

1. Noorliit iliveqarfia
2. Tuujuup iliveqarfia
3. Nuutoqqap iliveqarfia
4. Siaqqinnerup iliveqarfia

Nassuiaat / tunngavilersuut:

Siuserinnerusukkut siaqqinnermi iliveqarfimmut aqqut taaguuserneqarnikuugaluarpoq imatut : “*Iliveqarfiup aqqutaa*” tamannali siunnersuisoqatigiit eqqartoramikku uparuarneqarpoq taaguut naleqqutinngittoq, tunngavigalugu imatut nipeqartinneqalermat iliveqarfik allamut nikikkami aqqutigisimasaa. Tamannalu naleqqutinngittutut nalilernerneqarpoq iliveqarfik allamut nikinnaviannngimmat. Siunnersuutigineqarpoq iliveqarfiit Nuummiittut sumi inissisimanertik aallaavigalugu taaguuserneqarnissaat.

Aqquuserngit Narsaviaq / Salliarnaq iluarsiivigineqassasoq

Inassut:

1. Narsaviaq

2. Salliarnaq
3. Kippaa

Nassuiaat / tunngavilersuut:

Siunnersuisoqatigiit innutaasumit saaffiginnissut tinguaa. Tassani pineqarpoq pifiimmi sanaartukkat nalunaarsorneqarisa (Adressit) tukanneri iluarsivigineqartariaqartoq. Aaqqiisutissamik siunneruuteqarnermi aqqusineq ataseq nutaamik taaguuserneqassasoq siunnersuutigineqarpoq.

Sanaartorfissap nutaap aqqusinissaa atserneqassasoq

Inassut:

1. Alanngua

Nassuisat / tunngavilersuut:

Illoqarfimmut pilersaarusiame tapiliussaq KPT 4B10-mi aqqusinissaq pilersaarutaavoq. Alanngortami inissisimanera tunngavigalugu siunnersuutigineqarpoq.

Aningaasatigut suliatigullu Ingerlatsiviup naliliinera

Piffimmi aningaasartuutit ingerlatsivimmit aningaasaliissutaareersut iluanni pisinnaavoq.

Suliffeqarfimmut Kiffartuussivimmit aningaasatigut naliliineq

Pisariaqanngilaq.

Inatsisitigut tunngavissaq allakkallu tunngaviusumik uppersaataitallit

- Sumiiffiit Aqquserngillu Taaguutaannik Siunnersuisoqatigiinnut Ileqqoreqqusaq

Ilanngussat

1. Eqalugalinnguit aqquserngata ilaanut siunnersuut
2. Nuummi iliveqarfiit pigaarnerit sisamat
3. Narsaviaq / Salliarnaq / Kippaa
4. Alanngua
5. Innuttaasumit saaffiginnissut Eqaluaglinnguit pillugu
6. Innuttaasumit saaffiginnissut Narsaviaq / Salliarnaq pillugu
7. Tapersiiluni allagaqaat Nikolaj Heinrich Eqalualinnguit pillugu

Nunatarsuup nunataani qamutiniq motoorilinnik angallannissamut immikkut ittumik akuersissummik qinnuteqaat – Glacier Ridge Outfitters

Aalajangiiffigisassaq

SagsID.: EMN-2026-01615

Sanarfinermut Avatangiisinullu Ingerlatsivik – pisortaq Søren Pedersen / SSKP

Inassuteqaat

Sanarfinermut Avatangiisinullu Ingerlatsivimmit Inoqarfinnut Teknikkimut Avatangiisinullu

Ataatsimiititamut inassuteqaatigineqarpoq:

1. nunatarsuarmi ATV-nik angallannissamut qinnutigineqartumut Qamuteralaat pillugit ileqqoreqqusami § 6 malillugu Glacier Ridge Outfittersimut immikkut ittumik akuersissut nalunaarutigineqassasoq
2. suliaq Aningaasaqarnermut Inuussutissarsiornermullu Ataatsimiititamut kiisalu Kommunalbestyrelsimut akuerisassanngorlugu ingerlateqqinneqassasoq

Suliamik saqqummiussineq

Tammaarsimaarfiugallartussamik pilersitsinissamut ingerlatsinissamullu atatillugu Nunatarsuarmi ATV-nik angallannissamut immikkut ittumik akuersissut pillugu Glacier Ridge Outfittersimiit qinnuteqaat Sanarfinermut Avatangiisinullu Ingerlatsivimmiit tiguneqarpoq.

Suliniuteqarnermi tammajuitsussiniarluni tutunniarnermut tammaarfissaq kiisalu nunami soorlu aqissemiarnermik aalisarnermillu misigisassarsiortitsinerit pineqarput. Tammaarsimaarfimmi tikeraanut tupeq, sulisunut tupeq aamma tupeq ataatsimoorfittut nerinermilu atugassaq pigineqassapput.

Umiatsiamik taliffimmiit tammaarsimaarfiup tungaanut aqut 8 kilometerinik isorartussusilik ATV-nik angallaffiusussatut immikkut ittumik akuerineqarnissamut qinnuteqartoqarpoq (ilanngussaq 1 takuuk). Angallassisarneq piffissami juunip aallartinneraniit juulip naaneranut tikeraanik atortunillu angallassinerinnarmut pissaaq, sapaatillu akunneranut marloriarlutik sisamariarlutilluunniit angallattassallutik. Aqutissatut qinnutigineqartup annerpaartaa sioqqanik allequtaqarpoq aqutillu angallaffiusut taakku aqutigineratigut nunataanik naasoqassusaanillu sapinngisamik allanngutsaaleeqataasussaapput.

Pinngortitaleriffik aamma Nunatta Katersugaasivia Allagaateqarfialu ingerlatsivimmiit oqaaseqaateqartinneqarput.

Pinngortitaleriffik suliniummut akeriliissutissaqanngilaq, kisianni nunataa, uumasut avatangiisillu eqqarsaatigalugit immikkut ittumik akuersissuteqarfigineqarnera piumasaqaatitallersorneqarsinnaasoq kiisalu akuersissut piffissami aalajangersimasuinnarmiussasoq innersuussutigalugu.

Nunatta Katersugaasivia Allagaateqarfialuttaaq akeriliissutissaqanngilaq oqaaseqaatigalugulu, aqutissatut pilersarusiugaasoq qanganitsat eriagisassat avaqqullugit aaqqissuussaasoq. Qanganitsat eriagisassat nalunaarsugaasut pillugit illersorneqarnissaannut killeqarfeqarnissaanut piumasaqaateqassasoq kiisalu kulturikkut oqaluttuarisaanermut soqutiginaateqartunik nassaartoqassagaluarpas angallannerup unitsittarnissaanut nalunaarutigisarnissaannullu pisussaaffilersuisoqassasoq katersugaasivimmit innersuussutigineqarpoq.

Immikkut ittumik akuersissuteqartoqassagaluarpas piumasaqaataasussatut innersuussaasut malinneqarneratigut pinngortitamik, avatangiisinik kulturikkullu oqaluttuarisaanermut soqutigisat eqqarsaatigalugit suliniut naammassineqarsinnaasoq ingerlatsivimmiit nalilernerqarpoq.

Qinnuteqaat sapaatit akunnerini sisamani tamanut tusarniaassutigineqassasoq kingornalu inaarutaasumik akuersissutigineqarnissaa siunertaralugu politikkikkut oqaluuserisassanngortinneqassasoq ingerlatsivimmiit innersuussutigineqarpoq.

Nunaannarmi kiisalu illoqarfiit nunaqarfiillu killeqarfiini assartuutininik mootorinik ingerlatilinnik atuineq pillugu kommunip ileqqoreqqusaani § 6 innersuussutigalugu, angallannermut killeqarfiit avataatigut qamutininik mootorilinnik angallannissamut immikkut ittumik pisuni immikkut ittuni kommunalbestyrelsimiit nalunaarutigineqarsinnaapput. Suliniutitut qinnuteqaatigineqartoq immikkut ittumik akuerisassatut qinnuteqaatitut isigineqassaaq taamatorluinnarlu suliarineqassalluni.

Ingerlatsivimmit aningaasatigut sulisoqarnikkullu naliliinerit

Pisariaqanngilaq.

Missingersuusiornermut Naatsorsuusiornermullu Immikkoortortamit aningaasatigut naliliineq

Pisariaqanngilaq.

Inatsisitigut tunngavissaq allakkallu tunngaviusumik uppersaataillit

- Pilersaarusiorneq aamma nunaminertat atorineqartarnerat pillugit Inatsisartut inatsisissaannik nalunaarut nr. 4, 25. januaari 2024-meersoq
- Kommunimut pilersaarut digitalusoq www.kp.sermersooq.gl
- Nunaannarmi kiisalu illoqarfiit nunaqarfiillu killeqarfiini assartuutininik mootorinik ingerlatilinnik atuineq pillugu ileqqoreqqusaq (Qamuteralaat pillugit ileqqoreqqusaq) nr. 10, 10. oktobari 2013-meersoq.
- Assartuutit mootorinik ingerlatillit atorineqarneri pillugit Namminersorlutik Oqartussat nalunaarutaat nr. 10, 10. oktober 2013
- Inatsisartut inatsisaat nr. 1, 29. maaji 2012-meersoq

Ilanngussaq

1. Suliap nassuiarnera Glacier Ridge Outfitters
2. Pinngortitaleriffiup oqaaseqaataa 27. maaji 2026-meersoq
3. Nunatta Katersugaasiviata Allagaateqarfiatalu oqaaseqaataa 2. juuni 2026-meersoq
4. Qamuteralaat pillugit ileqqoreqqusaq

4B1-B-mi inissiivimmut nunaminertamik atuineq – Naternaq, Qinngorput

Aalajangiiffigisassaq

SagsID.: EMN-2025-00493

Sanarfinermut Avatangiisinullu Ingerlatsivik – pisortaq Søren Pedersen / SOSO

Inassuteqaat

Sanarfinermut Avatangiisinullu Ingerlatsivimmit Aningaasaqarnermut Inuussutissarsiornermullu Ataatsimiititamut inassuteqaatigineqarpoq:

1. Nunaminertaq inissiiviusoq 4B1-B-mi inissisimasoq kommunimi inissiivittut atornissaa siunertaralugu sanaartorfigissarneqarnissaa akuersissutigineqassasoq.
2. suliaq Aningaasaqarnermut Inuussutissarsiornermullu Ataatsimiititamut akuersissutigisassanngorlugu kiisalu Kommunalbestyrelsimut ilisimatitsissutitut ingerlateqqinneqassasoq

Suliamik saqqummiussineq

Nunaminertaq inissiivik nutaaq immikkoortup ilaani 4B1-imi Naternami inissisimasoq, kommunimi inissiivittut atulernissaanut sanaartorfissagissarneqassasoq Sanarfinermut Avatangiisinullu Ingerlatsiviup siunnersuutigaa.

Namminerisamik containerinut aammalu ukiumi umiatsianut inissiiviit inissaat killeqarput aammalu maannakkumut imaluunniit siunissami pisariaqartitsinermit naatsorsuutigisamut naapertuutigani. Maannakkut kommunimi inissiiviit inissisimaffii illoqarfiup ineriartortinnissaanut atugassami annermi inissisimapput, matumani Qeqertani aamma Eqalugalissuarni inissiivinnut nunaminertat ilanngullugit - Ilangussaq 1 takuuk. Tamannalu kommunimi inissiiviit siunissami killeqarnerulernissaannut sunniuteqaqataassaaq.

Sanarfinermut Avatangiisinullu Ingerlatsivimmit illoqarfiup ilaanut pilersaarut 4B1-B suliarineqarpoq, tassani nunaminertaq inissiivissaq annertoq atugassanngortinneqarluni. Illoqarfiup ilaanut pilersaarummi nunaminertanut inissiivissat kommunimi inissiivissamik pisariaqartitsinerit naammassilluarsinnaassagaat ilimagineqarpoq, tamannalu isumaqarpoq kommune containerinut inissiivissanik aammalu ukiumi umiatsianut inissiivissanik Nuummi neqerooruteqaannarsinnaasoq.

Suliffeqarfiit inissiiviannik angisuumik assingusumik kiffartuussinissamik kissaateqarlutik, Inuussutissarsiortut namminersortut nalunaarutigaat. Nuummi inuussutissarsiortut suliasaq tamanna kivissinnaassagaat ilimagineqarpoq. Kissaatigineqarpat kommunimit namminersorlutik inuussutissarsiutillit akornanni makitsinikkut 4B1-B-mi nunaminertaq inissiivissaq atugassanngortinneqarsinnaavoq. Tamannalu sanaartornermi ingerlatsinermilu aningaasartuutaasut umiatsiamik containerinillu piginnittut ataasiakkaat aningaasartuutiginagu namminersorlutik inuussutissarsiutillinnit aningaasartuutigineqassaaq. Kingunerisinnaavaalu umiatsiat containerillu illoqarfinni sumiiffimmut allamut nunaminertamut akuersissuteqarfiunngitsumut inissinneqarneri, tamannalu illoqarfiup isikkuanik ajornerulersitsisinnaavoq aammalu nakkutilliinermit immikkoortortaqqarfik suliasaanik oqimaannerulersitsisinnaalluni - Angallannermit Nakkutilliiner mullu Immikkoortortaqqarfiimit kingunerisassaanik naliliineq ilanngussaq 2-mi takuuk.

Ingerlatsivimmit aningaasatigut sulisoqarnikkullu naliliinerit

Kommunimit inissiivittut atorineqaraluarpat imaluunniit namminersorlutik inuussutissarsiutillinnut atugassanngortinneqaraluarpat, nunaminertanik inissiivissanik sanaartorfissagissaaneq kommunimit sanaartorfissagissaanermi aningaasartuutigineqartunut atassuteqarpoq.

Nunaminertamik atuisussap sanaartorfissagissaanermut akileraarummik akiliineratigut imaluunniit kommune containerinut umiatsianullu inissiivinnik attartortitsineratigut sanaartorfigissaanermi aningaasartuutit utertinneqassapput.

Missingersuusiornermut Naatsorsuusiornermullu Immikkoortortamit aningaasatigut naliliineq

Pisariaqanngilaq.

Inatsisitigut tunngavissaq allakkallu tunngaviusumik uppersaataillit

- Pilersaarusiorneq aamma nunaminertat atorineqartarnerat pillugit Inatsisartut inatsisissaannik nalunaarut nr. 4, 25. januaari 2024-meersoq.
- Kommunimut pilersaarut digitaliusoq www.kp.sermersooq.gl

Ilanngussaq

1. Kommunimit nunaminertat inissiivissat
2. Angallannermut Nakkutilliinermullu Immikkoortortamiit kingunerisassaanik naliliineq



Illu aalaffiusoq Nuussuaq, Nuuk

Aalajangiiffigisassaq

SagsID.: EMN-2025-03210

Sanarfinermut Avatangiisinullu Ingerlatsivik – pisortaq Søren Pedersen / SSKP

Inassuteqaat

Sanarfinermut Avatangiisinullu Ingerlatsivimmit Inoqarfinnut Teknikkimut Avatangiisinullu

Ataatsimiititamut inassuteqaatigineqarpoq:

1. Issittumi Illu Aalaffiusumut pilersaarummut titartagaliaq akuersissutigineqassasoq
2. suliaq Aningaasaqarnermut Inuussutissarsiornermullu Ataatsimiititamut kiisalu Kommunalbestyrelsimut akuersissanngorlugu ingerlateqqineqassasoq

Suliamik saqqummiussineq

Sanarfinermut Avatangiisinullu Ingerlatsivimmit aamma Meeqqanut Atuarfeqarnermullu

Ingerlatsivimmit Nuussuup Timersortarfianik ineriartortitsinissaq pillugu misissueqqaarneq

matumuuna saqqummiunneqarpoq.

Misissueqqaarneq pilersaarummut titartagartaliornermik kinguneqarpoq, tassani timersortarfiup pioreersup issittumi illu aalaffiusumut ineriartortinnissaa allaaserineqarpoq, taanna aalanissamut, ilinniarnissamut, ataatsimoorinissamut isersimaarfiunissamut inissaqassalluni. Pilersaarummut titartakkami ilaatigut qitiusumik naapittarfik iggavittalik isersimaartarfitalillu, kulturikkut aalanissamullu inersuit kiisalu aalanissamut, pissittaarnissamut, qallornissamut nukkassarnissamullu atortut ilaapput, taamaalilluni timersortarfik sammisassanut atuisunullu arlalinnut inissaqassaaq.

Pilersaarummi peqqissuunermik, atugarissaarnermik ataatsimoornermillu siuarsaataasumik inuiaqatigiinnut ammasumik peqataatitsiffiusumillu naapittarfimmik pilersitsinissaq siunertarineqarpoq. Peqatigitillugu pilersaarut ulluinnarni sunngiffimmilu aalanermut pitsaannerusumik atugassaqaartitsilissaaq aamma atuarfinnut, paaqqinniffinnut peqatigiiffinnullu tapertaalluni kiisalu Nuussuullu ataatsimut kivinneqarnissanut iluaqutaassalluni.

Pilersaarummut titartagaq sumiiffinni misissuinerinik ingerlanneqartunik aamma innuttaasunik atuisunullu annertuumik peqataatitsinermik tunngaveqarpoq, tassani kissaatit pisariaqartitalu tiguneqartut pilersaarutip imarisaanut atorneqarneranullu tunngavissiipput.

Pilersaarummut titartagaq pilersaarummik inerisaaqqinnissaq siunertaralugu akuersissutigisassanngorlugu saqqummiunneqarpoq, matumunnga ilanngullugit missiliuutitut naatsorsuutitalimmik pilersaarutitut siunnersuusiorneq kiisalu pilersaarummik piviusunngortitsinissamut aningaasaateqarfimmik tunissuteqarfigineqarnissamut qinnuteqaasiorneq.

Ingerlatsivimmit aningaasatigut sulisoqarnikkullu naliliinerit

Pilersaarummut titartagaliorneq Aningaasaliissutit 23-mit – Aningaasaateqarfimmit

Aningaasaliissutinit aningaasalerneqarpoq. Ingerlatsivimmit ukioq naallugu suliaqarnerit 1/2-it

nalingi atorneqarput aamma kommunimut pilersaarummik aaqqissuussinermut ukioq naallugu

suliaqarnerit 1/3-t atorneqassasut naatsorsuutigineqarpoq.

Missingersuusiornermut Naatsorsuusiornermullu Immikkoortortamit aningaasatigut naliliineq



Pisariaqanngilaq.

Inatsisitigut tunngavissaq allakkallu tunngaviusumik uppersaarsaatillit

- Kommunimut pilersaarut digitalusoq www.kp.sermersooq.gl
- Pilersaarusiornermut periusissiaq 2023
- Illoqarfiit pingaarnersaat pillugu periusissiaq Nuuk 2035
- Meeqqanik inuusuttunillu suliaasaqarfimmi Peqqinnermik Siuarsaanermut Pitsaaliuinerimullu Periusissiaq 2024-2030
- Kalaallit Nunaanni Timersoqatigiit Kattuffiannik suleqatigiinnissamut isumaqatigiissuteqarneq

Ilanngussaq

1. Pilersaarummut titartagaq Issittumi Illu Aalaffiusoq
2. Najoqqutassiaq

Sanaartorfissat 9-p aamma 10-p, Eqinga Nuuk, atugassiissutigineqarneri

Aalajangiiffigisassaq

SagsID.: EMN-2026-01533

Sanarfinermut Avatangiisinullu Ingerlatsivik – Søren Pedersen / SOSO

Inassuteqaatit

Sanarfinermut Avatangiisinullu Ingerlatsivimmit Teknikkeqarnermut Avatangiisinullu

Ataatsimiititamut inassuteqaatigineqarpoq:

1. sanaartorfissat 9-p aamma 10-p atugassiissutigineqarneri akuersissutigineqassasoq
2. suliaq Aningaasaqarnermut Inuussutissarsiornermullu Ataatsimiititamut kiisalu Kommunalbestyrelsimut akuersissutigisassanngorlugu ingerlateqqinneqassasoq

Suliamik saqqummiussineq

Kommunalbestyrelsip septembarimi 2006-mi Nuummi immikkoortup ilaanut 4C4-mut kommunimut pilersaarummut tapiliussaq akuersissutigaa, piffissami akuersissussutigineqarnerani immikkoortup ilaa taaneqartoq 4D3-uvoq - Qinngutsinni Umiatsialivik Eqinga. Sanaartorfissat assigiinngitsunik siunertallit aqqutigalugit immikkoortup ineriartortinneqarnissaanut najoqqutassanik pilersitsinissaq pilersaarummut tapiliussamut siunertaavoq.

Kommunimut pilersaarummut tapiliussami sanaartorfissat katillugit qulit atugassiissutigineqarput. Taakkua amerlanersaat sanaartorfineqarput atorneqarlutillu, sanaartorfissallu 9 aamma 10 suli sanaartorfineqanngillat. Sanaartorfissat taakkua marluk pilersaarummi tamat kiffartuussassat atugassaattut atorneqartussatut atugassiissutigineqarput, soorlu *"unnuisarfiit, neriniartarfiit, café, saqqummersitsiviit kulturimi siunertanut assingusunut."* Tamatuma saniatigut pilersaarut illut initaanni qullerni inissianik pilersitsinissamut periarfissiivoq. Aalajangersakkat atuuttut naapertorlugit sanaartornermi immikkoortoq 28 qaangerneqassanngilaq. Ilutigalugu tunngaviumik nunap assingani illut tunorliit toqqavii immikkoortoq 28-p missaani inissisimasut takuneqarsinnaavoq, aamma taamaalilluni nutaamik sanaartorneq illut taakkua isikkiviinut sunniuteqassanatik.

Naak pilersaarutip akuersissutigineqarnerat ukiut 20-ngajaat ingerlareeraluartut sanaartorfissat suli piviusunngortinneqanngillat. Taamaattumik sanaartorfissat atugassiissutigineqassanersut aamma Qinngutsinni ineriartornerup taperseerineqarnissaa siunertaralugu nunaminertatut atorneqanngitsut saqqummiunneqarnissaat pillugu politikkikkut isummernissaq pisariaqartinneqartoq ingerlatsivimmit naliliisoqarpoq.

Sanaartorfissat atugassiissutigineqarneri immikkoortumi suliassaqarnerulersitsissaaq, umiatsialiviup eqqaani sukisaarsarnermi kulturikkullu neqeroorutitut nukittorsaassaaq kiisalu illoqarfimmi ineriartortitsiinnarnissamut tapertaassalluni. Taamaattumik ingerlatsivimmit sanaartorfissat 9-p aamma 10-p siunissami atugassiissutigineqarnissai pillugit ataatsimut politikkikkut aalajangiisoqarnissaa inassuteqaatigineqarpoq.

Ingerlatsivimmit aningaasatigut sulisoqarnikkullu naliliinerit

Sanaartorfissanik atugassiissutiginninneq sulisutigut imaluunniit aningaasatigut ingerlatsivimmut sunniuteqartitsissanngilaq. Sanaartorfissanik taamaatitsinermi immikkoortumi pilersaarummik nutaamik suliaqarnissamut pisariaqartitsiffiulissaaq, tamannalu pilersaarusiornermi immikkoortortaarfimmi sulisunik ukioq naallugu atuneq 1/3-miissasoq naliliiffigineqarpoq.

Missingersuusiornermut Naatsorsuusiornermullu Immikkoortortamit aningaasatigut naliliineq

Pisariaqanngilaq.

Inatsisitigut tunngavissaq allakkallu tunngaviusumik uppersaattillit

- Pilersaarusiorneq aamma nunaminertat atorneqartarnerat pillugit Inatsisartut inatsisissaannik nalunaarut nr. 4, 25. januaari 2024-meersoq
- Kommunimut pilersaarut digitaliusoq www.kp.sermersooq.gl
- Pilersaarusiornermut periusissiaq 2023
- Illoqarfiit pingaarnersaat pillugu periusissiaq Nuuk 2035

Ilanngussaq

1. Nunap assinga ilanngussaq
2. Eqinganut pilersaarummut tapiliussaq atuuttoq



Illoqarfiup ilaanut pilersaarutit siunnersuut 1C3-B - Dronning Ingridsvej pillugu tamanut tusarniaaneq

Aalajangiiffigisassaq

SagsID.: EMN-2025-03866

Sanarfinermut Avatangiisinullu Ingerlatsivik – pisortaq Søren Pedersen / SOSO

Inassuteqaat

Sanarfinermut Avatangiisinullu Ingerlatsivimmit Inoqarfinnut Teknikkimut Avatangiisinullu

Ataatsimiititamut inassuteqaatigineqarpoq:

1. illoqarfiup ilaanut pilersaarummut 1C3-B-mut siunnersuut Dronning Ingridsvej sapaatip-akunnerini arfineq-pingasuni tamanut tusarniaassutigineqarnissaa akuersissutigineqassasoq
2. suliaq tamanut tusarniaassutigineqarnissaa siunertaralugu Aningaasaqarnermut Inuussutissarsiornermullu Ataatsimiititamut akuersissutigisassanngorlugu kiisalu Kommunalbestyrelsimut ilisimatitsissutitut ingerlateqqinneqassasoq

Suliamik saqqummiussineq

Sanarfinermut Avatangiisinullu Ingerlatsivimmit illoqarfiup ilaanut pilersaarutit siunnersuut 1C3-B – Dronning Ingridsvej matumuuna saqqummiunneqarpoq.

Illoqarfiup ilaanut pilersaarut 1C3-B suliarineqarpoq B-1439-mut aamma B-2060-imut nunaminertamik atuisussaataasup kissaatigimmagu illut pioreersut isaternissaat kiisalu ulluinnarni niuertarfittut akunnittarfittullu ataatsimoortillugit sananissaat. Kommunimut pilersaarut 2036 naapertorlugu, immikkuualuttumut B-mut illoqarfiup ilaanut pilersaarummik nutaamik suliaqartoqassaaq, nutaamik sanaartortoqalinnginnerani.

Illoqarfiup ilaanut pilersaarut kommunimut pilersaarummut tapiliussamut nr. 14-imut atatillugu suliarineqassaaq, Aningaasaqarnermut Inuussutissarsiornermullu Ataatsimiititamilu suliarineqassalluni.

Siunnersuut sapaatip-akunnerini arfineq pingasuni tamanut tusarniaassutigineqassaaq.

Matumani illoqarfiup ilaanut pilersaarutit siunnersuut 1C3-B Dronning Ingridsvej pillugu akuersissuteqarneratigut illoqarfiup ilaanut pilersaarutini pioreersunik atorunnaartoqanngilaq.

Ingerlatsivimmit aningaasatigut sulisoqarnikkullu naliliinerit

Ingerlatsivimmi Kommunimut pilersaarummut tapiliussamik suliaqarnissami ukioq naallugu suliffiit 1/4 pisariaqartinneqassasut nalilerneqarpoq.

Missingersuusiornermut Naatsorsuusiornermullu Immikkoortortamit aningaasatigut naliliineq

Pisariaqanngilaq.

Inatsisitigut tunngavissaq allakkallu tunngaviusumik uppersaatiillit

- Pilersarusiorneq aamma nunaminertat atorineqartarnerat pillugit Inatsisartut inatsississaannik nalunaarut nr. 4, 25. januaari 2024-meersoq.



- Kommunimut pilersaarut digitaliusoq www.kp.sermersooq.gl

Ilanngussaq

1. Allannguutitut takussutissaq
2. Illoqarfiup ilaanut pilersaarutitut siunnersuut 1C3-B – Dronning Ingridsvvej



Illoqarfiup ilaanut pilersaarutitut siunnersuut 4B5-B Isuliffik pillugu tamanut tusarniaaneq

Aalajangiiffigisassaq

SagsID.: EMN-2025-00492

Sanarfinermut Avatangiisinullu Ingerlatsivik – pisortaq Søren Pedersen / SOSO

Inassuteqaat

Sanarfinermut Avatangiisinullu Ingerlatsivimmit Teknikkeqarnermut Avatangiisinullu Ataatsimiititaq inassuteqaatigineqarpoq:

1. Illoqarfiup ilaanut pilersaarutitut siunnersuut 4B5-B Isuliffik sapaatip-akunnerini arfinilinni tamanut tusarniaassutigineqarnissaa akuersissutigineqassasoq
2. suliap tamanut tusarniaassutigineqarnissaa siunertaralugu Aningaasaqarnermut Inuussutissarsiornermullu Ataatsimiititamut akuersissutigisassanngorlugu kiisalu Kommunalbestyrelsimut ilisimatitsissutitut ingerlateqqinneqassasoq

Suliassamik saqqummiussineq

Sanarfinermut Avatangiisinullu Ingerlatsivimmit illoqarfiup ilaanut pilersaarutitut siunnersuut 4B5-B Isuliffik matumuuna saqqummiunneqarpoq.

Nuummi inuussutissarsiuteqartut illoqarfiup sinneraniittut assigalugit ineriartorfiupput, inuussutissarsiuteqartunullu nunaminertanik sanaartortussaataitanermik piumasaqaateqarfiunngitsunik noqqaasoqarpoq. Kommuneqarfik Sermersuumi Kommunalbestyrelsimut Kommunimut pilersaarut 2036 aqqutigalugu pingaartinneqarpoq Nuummi inuussutissarsiuteqartut pitsanngorsaaviginissaat periarfissaannillu siuarsaaviginissaat. Illoqarfiup ilaanut pilersaarut una aqqutigalugu suliamut iluaqutaassaaq.

Illoqarfiup ilaanut pilersaarummi immikkoortumi ullutsinnut naapertuuttumik ineriartortitsinissamik qulakkeerinninnissaq siunertarineqarpoq, tassani inuussutissarsiortunut atorineqartussanik nunaminertanik inissiivissanik nutaanik atungassiisoqarluni. Immikkuualuttoq B inissiivissatut nunaminertamut atugassanngortinneqarpoq, tassani Nuummi inuussutissarsiuteqartut inissiinissaminut pisariaqartitaat annertusiartortoq naammassineqassalluni. Maskiinanik sanaartornermilu atorussanik inissiinissamut immikkut pisariaqartitsineq isiginiarneqarpoq, tamanna nunaminertani inaaliiviusuni sanaartornissamut piumasaqaateqartoqannginnissamik piumasaqaateqarfiuvoq.

Matumani Kommunimut pilersaarummut tapiliussassatut siunnersuutip akuersissutigineqarneratigut pilersaarutininik atorunnaarsitsisoqassanngilaq. Siunnersuut sapaatip akunnerini arfinilinni tamanut tusarniaassutigineqassaaq.

Ingerlatsivimmit aningaasatigut sulisoqarnikkullu naliliinerit

Ingerlatsivimmi immikkoortumut pilersaarummik siunnersuummik suliaqarnissami ukioq naallugu suliffiit 1/4 pisariaqartinneqassasut nalilerneqarpoq.

Missingersuusiornermut naatsorsuusiornermullu immikkoortortamit aningaasatigut naliliineq

Pisariaqanngilaq.



Inatsisitigut tunngavissaq allakkallu tunngaviusumik uppersaatillit

- Pilersaarusiorneq aamma nunaminertat atorneqartarnerat pillugit Inatsisartut inatsisissaannik nalunaarutaat nr. 4, 25. januar 2024-meersoq
- Kommunimut pilersaarut digitaliusoq www.kp.sermersooq.gl

Ilanngussat

1. Illoqarfiup ilaanut pilersaarut 4B5-B Isuliffik pillugu siunnersuut

Nuummi biilnik inissiisarfinni kommunimiit nakkutilliisoqalernissaa

Oqaluuserisassaq

SagsID.: EMN-2025-01370

Sanarfinermut Avatangiisinullu Ingerlatsivik – pisortaq Søren Pedersen / SOSO

Inassuteqaat

Sanarfinermut Avatangiisinullu Ingerlatsivimmit Inoqarfinnut Teknikkimut Avatangiisinullu

Ataatsimiititamut inassuteqaatigineqarpoq:

1. Nuummi kommunimiit biilnik inissiisarfinni nakkutilliisoqalernissaanut suliaq aallartisarneqarnissaa eqqartorneqassasoq
2. suliaq Aningaasaqarnermut Inuussutissarsiornermullu Ataatsimiititamut kiisalu Kommunalbestyrelsimut eqqartugassanngorlugu ingerlateqqinneqassasoq

Suliamik saqqummiussineq

Nuummi unioqqutitsisumik pissusissamisuunngitsumillu biilnik inissiisarnerit Sanarfinermut Avatangiisinullu Ingerlatsivimmiit unamminartinneqaleraluttuinnarput. Illoqarfiup ineriartornera, angallattoqarnerulernera qamutillu motoorillit amerliartornerisa kingunerisaannik aqqusernit, pisuinnaat aqqutaat, cykelit aqqutaat tamallu ataatsimut aqqutaat tatineqaleraluttuinnarput. Cykelit aqqutaanni, pisuinnaat aqqutaanni, inuit innarluutillit inissiiviini, biilerfioqqusaanngitsuni kiisalu sumiiffinni allani biilnik uninngaffigeqqusaanngitsuni inissiivigeqqusaanngitsunilu imaluunniit akornutaasarneri pillugit innuttaasunit saaffiginnissutit ataavartut ingerlatsivimmiit tiguneqartarput. Taamaammatt ingerlatsiviup ulluinnarni ingerlatsineranut, matumani aputaajaanermut aamma upalungaarsimasut aqqutigineqarsinnaaneratt ilanngullugit ajornartorsiortitsipput.

Naak sumiiffinni arlalinni erseqqissunik allagartalersuisoqaraluartoq, malittarisassat atuuttut kommunimiit ullumikkut atortuutitsilernissamat periarfissaqanngilaq. Tamanna ima paasisassaavoq, malittarisassat erseqqissunik allagartalersugaagaluartut unioqqutitsilluni inissiisarnerit suli piusartut.

Kalaallit Nunaanni kommunimiit biilnik inissiisarfinni nakkutilliisoqartarneq pillugu nalunaarutip kingunerisaanik kommunit biilnik inissiisarfinni nakkutilliisalernissaat aamma uninngaasarnermut inissiinermullu angallannermi inatsisitigut malittarisassat unioqqutinneratigut inissiinermut akitsuusiisalernissaat periarfissaalissaaq.

Tamanna tunngavigalugu kommunimiit biilnik inissiisarfinni nakkutilliisoqalernissaanut periarfissat misissornissaat siunertaralugu suliamik aallartitsisoqassasoq ingerlatsivimmiit siunnersuutigineqarpoq. Suliaq Nuummiinnaq aallaqqaammut pissasoq siunnersuutigineqarpoq, Nuummimi unamminartitat annerpaammata.

Malittarisassanik atuuttunik eqquutsitsisarnissaaq, angallannermi isumannaannerulersitsinissaaq tikikkuminarsaanissaaq qulakkeerneqassasut kiisalu nunaminertat tamanit atorneqartartut siunertaannut atorneqarlutik qulakkeerneqarnissaat siunertaavoq.

Suliaq immikkoortukkuutaartumik agguataarneqassasoq siunnersuutigineqarpoq. Erseqqissunik unioqqutitsiffiunerpaasartunik, matumani cykelit aqqutaanni, pisuinnaat aqqutaanni kiisalu sumiiffinni allagartalersuinikkut takuneqarsinnaasumik inissiivigeqqusaanngitsuni atortuutilersitsinissaaq immikkoortoq siullermi pineqarput. Immikkoortup tullia tassaasinnaavoq biilnik inissiisarfinni tamanit atorneqartartuni inissiisarnermut naleqqussaaneq, matumani piffissami killilikkami inissiisarneq ilanngullugu.

Suleriaqqinnermi kommunimiit biilnik inissiisarfinni nakkutilliisarnep aqqissuussatigut aqqissugaanera qulaajarneqassaaq. Kalaallit Nunaanni Politiit, Upalungaarsimasut, Angallannermut Siunnersuisooqatigiit suliniummut tapersersuineramik nalunaarutiginnittuusut oqaloqatiginerisigut sulineq ingerlanneqassaaq.

Atuutilersitsinerup ilaattut atuutilersitsisoqassappat tamanna sioqqullugu innuttaasunut erseqqissumik ilitersuinissamik qulakkeerinnittoq paasissutissiinissamut attaveqatigiinnissamullu pilersaarut suliarineqassaaq.

Ingerlatsivimmit aningaasatigut sulisoqarnikkullu naliliinerit

Pisariaqanngilaq.

Missingersuusiornermut Naatsorsuusiornermullu Immikkoortortamit aningaasatigut naliliineq

Pisariaqanngilaq.

Inatsisitigut tunngavissaq allakkallu tunngaviusumik uppersaatillit

- Angallannermut politikki
- Kalaallit Nunaanni kommunit biilnik inissiineramik nakkutilliinerat pillugu nalunaarut nr. 966, 25. september 2008-meersoq
- Kalaallit Nunaanni aqqusinertigut angallannermut inatsit pillugu nalunaarut nr. 995, 26. oktober 2009-meersoq

Ilanngussaq

1. Pilersaarut pillugu allaaserisaq
2. Kalaallit Nunaanni kommunit biilnik inissiineramik nakkutilliinerat pillugu nalunaarut nr. 966, 25. september 2008-meersoq
3. Kalaallit Nunaanni aqqusinertigut angallannermut inatsit pillugu nalunaarut nr. 995, 26. oktobari 2009 (eqikkagaq)

